

經史百家雜鈔

經史子集

經史百家雜鈔卷七目錄

詞賦之屬下編二

曹植制命宗聖侯孔羨奉家祀碑

陸機漢高祖功臣頌

陸雲榮啟期贊

張華女史箴

張載劒閣銘

嵇康太師箴

潘尼乘輿箴

釋奠頌

摯虞太康頌

尚書令箴

郭璞山海經圖贊

夏侯湛東方朔畫贊

袁宏三國名臣序贊

孫綽聘士徐君墓頌

陶潛讀史述

傅玄擬金人銘作口銘

裴子野女史箴

卞蘭座右銘

王褒皇太子箴

高允徵士頌

元結中興頌

韓愈五箴

後漢三賢贊

柳宗元伊尹五就桀贊

平淮夷雅

程子四箴

范浚心箴

朱子六先生畫像贊

經史百家類事

卷七

目錄

二

經史百家雜鈔卷七目錄

經史百家雜鈔卷七

湘鄉曾國藩纂

合肥李鴻章校

詞賦之屬下編二

曹植制命宗聖侯孔羨奉家祀碑

維黃初元年大魏受命亂軒轅之高蹤紹虞氏之遐統應歷數
以改物揚仁風以作教於是輯五瑞班宗彝鈞衡石同度量秩
羣祀於無文順天時以布化既乃緝熙聖緒紹顯上世追存三
代之禮兼紹宣尼之後以魯縣百戶命孔子二十一世孫議郎
孔羨爲宗聖侯以奉孔子之祀制詔三公曰昔仲尼負大聖之
才懷帝王之器當衰周之末而無受命之運在魯衛之朝教化

洙泗之上栖栖焉皇皇焉欲屈己以存道貶身以救世於是王公終莫能用之乃退考五代之禮修素王之事因魯史而制春秋就太史而正雅頌俾千載之後莫不宗其文以述作仰其聖以謀咨可謂命世大聖億載之師表者也遭天下大亂百祀墮壞舊居之廟毀而不修喪成之後絕而莫繼闕里不聞講誦之聲四時不睹烝嘗之位斯豈所謂崇禮報功盛德必百世祀者哉嗟乎朕甚憫焉其以議郎孔羨爲宗聖侯邑百戶奉孔子之祀令魯郡修起舊廟置百戶卒史以守衛之又於其外廣爲屋宇以居學者於是魯之父老諸生游士睹廟堂之始復觀俎豆之初設嘉聖靈於髣髴想禎祥之來集乃慨然而歎曰大道衰

廢禮樂絕滅三十餘年皇上懷仁聖之懿德兼二儀之化育廣
大包於無方淵深淪於不測故自受命以來天人咸和神氣氤
氲嘉瑞踵武休徵屢臻殊俗解編髮而慕義遐夷越險阻而來
賓雖太皞遊龍以君世虞氏儀鳳以臨民伯禹命元宮而爲夏
后西伯由岐社而爲周文尙何足稱於大魏哉若乃紹繼微絕
興修廢官疇咨稽古崇配乾坤況神明之所福作宇宙之所觀
欣欣之色豈徒魯邦而已哉爾乃感殷人路寢之義嘉先民泮
宮之事以爲高宗僖公蓋嗣世之王諸侯之國耳猶著德於三
代騰聲於千載況今聖王肇造區夏創業垂統受命之日曾未
下輿而褒美大聖隆化如此能無頌乎乃作頌曰

煌煌大魏受命溥將繼體黃唐包夏含商降釐下土廓清三光
羣祀咸秩靡事不綱嘉彼元聖有赫其靈遭世霧亂莫顯其榮
袞成旣絕寢廟斯傾闕里蕭條靡紹靡馨我皇悼之尋其世武
乃建宗聖以紹厥後修復舊堂豐其費宇莘莘學徒爰居爰處
王教旣新羣小遄沮魯道以興永作憲矩洪聲豈遐神祇來和
休徵雜遘瑞我邦家內光區域外被荒遐殊方慕義搏拊揚歌
於赫四聖運世應期仲尼旣沒文亦在茲彬彬我后越而五之
垂於億載如山之基

陸機漢高祖功臣頌

相國鄧文終侯沛蕭何相國平陽懿侯沛曹參太子少傅畱文

成侯韓張良丞相曲逆獻侯陽武陳平楚王淮陰韓信梁王昌
邑彭越淮南王六鯨布趙景王大梁張耳韓王韓信燕王豐盧
綰長沙文王吳芮荆王沛劉賈太傅安國懿侯王陵左丞相絳
武侯沛周勃相國舞陽侯沛樊噲右丞相曲周景侯高陽酈商
太僕汝陰文侯沛夏侯嬰丞相潁陰懿侯睢陽灌嬰代丞相陽
陵景侯魏傅寬車騎將軍信武肅侯靳歙大行廣野君高陽酈
食其中郎建信侯齊劉敬太中大夫楚陸賈太子太傅稷嗣君
辟叔孫通魏無知護軍中尉隨何新城三老董公轅生將軍紀
信御史大夫沛周苛平國君侯公右三十一人與定天下安社
稷者也頌曰

芒芒宇宙上塤下黷波振四海塵飛五岳九服徘徊三靈改卜
赫矣高祖肇載天祿沈迹中鄉飛名帝錄慶雲應輝皇階授木
龍興泗濱虎嘯豐谷彤雲晝聚素靈夜哭金精仍頽朱光以渥
萬邦宅心駿民效足堂堂蕭公王迹是因綢繆叡后無競維人
外濟六師內撫三秦拔奇夷難邁德振民體國垂制上穆下親
名蓋羣后是謂宗臣平陽樂道在變則通爰淵爰嘿有此武功
長驅河朔電擊壤東協策淮陰亞迹蕭公文成作師通幽洞冥
永言配命因心則靈窮神觀化望影揣情鬼無隱謀物無遁形
武關是闢鴻門是甯隨難滎陽卽謀下邑銷印懸廢推齊勸立
運籌固陵定策東襲三王從風五侯允集霸楚實喪皇漢凱入

怡顏高覽。彌翼鳳戢。託迹黃老。辭世卻粒。曲逆宏達。好謀能深。
遊精杳漠。神迹是尋。重玄匪奧。九地匪沈。伐謀先兆。擠響于音。
奇謀六奮。嘉慮四迴。規主於足。離項于懷。格人乃謝。楚翼寔摧。
韓王窘執。胡馬洞開。迎文以謀。哭高以哀。灼灼淮陰。靈武冠世。
策出無方。思入神契。奮臂雲興。騰迹虎噬。凌險必夷。摧剛則脆。
肇謀漢濱。還定渭表。京索旣扼。引師北討。濟河夷魏。登山滅趙。
威亮火烈。勢踰風埽。拾代如遺。偃齊猶草。二州肅清。四邦咸舉。
乃眷北燕。遂表東海。克滅龍且。爰取其旅。劉項懸命。人謀是與。
念功惟德。辭通絕楚。彭越觀時。弢迹匿光。人具爾瞻。翼爾鷹揚。
威凌楚域。質委漢王。靖難河濟。卽宮舊梁。烈烈黥布。耽耽其眈。

名冠彊楚鋒猶駭電覩幾蟬蛻悟主革面肇彼梟風翻爲我扇
天命方輯王在東夏矯矯三雄至于垓下元凶旣夷寵祿來假
保大全祚非德孰可謀之不臧舍福取禍張耳之賢有聲梁魏
士也罔極自詒伊愧俯思舊恩仰察五緯脫迹連難披榛來泊
改策西秦報辱北冀悴葉更輝枯條以肄王信韓孽宅土開疆
我圖爾才越遷晉陽盧綰自微婉變我皇跨功踰德祚爾輝章
人之貪禍甯爲亂亡吳芮之王祚由梅銷功微勢弱世載忠賢
肅肅荆王董我三軍我圖四方殷薦其勳庸親作勞舊楚是分
往踐厥宇大啟淮墳安國遲親悠悠我思依依哲母旣明且慈
引身伏劔永言固之淑人君子實邦之基義形於色憤發于辭

主亡與亡。末命是期。絳侯質木。多略寡言。曾是忠勇。惟帝攸歎。
雲驚靈邱。景逸上蘭。平代禽豨。奄有燕韓。甯亂以武。獎呂以權。
滌穢紫宮。徵帝太原。實惟太尉。劉宗以安。挾功震主。自古所難。
勳耀上代。身終下落。舞陽道迎。延帝幽敷。宣力王室。匪惟厥武。
總干鴻門。披闥帝宇。聳顏誚項。掩淚悟主。曲周之進。于其哲兄。
俾率爾徒。從王于征。振威龍蛻。聽武庸城。六師寔囚。克荼禽黥。
猗歟汝陰。綽綽有裕。戎軒肇迹。荷策來附。馬煩轡殆。不釋擁樹。
皇儲時父。平城有謀。顧陰銳敏。屢爲軍鋒。奮戈東城。禽項定功。
乘風藉響。高步長江。收吳引淮。光啟于東。陽陵之勳。元帥是承。
信武薄伐。揚節江陵。夷王殄國。俾亂作懲。恢恢廣野。誕節令圖。

進謁嘉謀退守名都東窺白馬北距飛狐卽倉敖庾據險三塗
輜軒東踐漢風載徂身死于齊非說之幸我皇實念言祚爾孤
建信委輅被褐獻寶指明周漢銓時論道移帝伊洛定都豐鎬
柔遠鎮邇實敬攸考抑抑陸生知言之貫往制勁越來訪皇漢
附會平勃夷凶翦亂所謂伊人邦家之彥百王之極舊章靡存
漢德雖朗朝儀則昏稷嗣制禮下肅上尊穆穆帝典煥其盈門
風晞三代憲流後昆無知叡敏獨昭奇迹察侔蕭相貺同師錫
隨何辯達因資於敵紆漢披楚唯生之績幡幡董叟謀我平陰
三軍縞素天下歸心袁生秀朗沈心善照漢旆南振楚威自撓
大略淵回元功響効邈哉惟人何識之妙紀信誑項輜軒是乘

攝齊赴節。用死孰懲。身與煙銷。名與風興。周苛慷慨。心若懷冰。
刑可以暴志。不可凌貞。軌偕沒亮。迹雙升。帝疇爾庸。後嗣是膺。
天地雖順。王心有違。懷親望楚。永言長悲。侯公伏軾。皇媼來歸。
是謂平國。寵命有輝。震風過物。清濁効響。大人于興。利在攸往。
弘海者川。崇山惟壤。韶濩錯音。袞龍比象。明明眾哲。同濟天網。
劍宣其利。鑒獻其朗。文武四充。漢祚克廣。悠悠遐風。千載是仰。
陸雲榮啟期贊

榮啟期者。周時人也。值衰世之季。末當王道之頽凌。遂隱居窮
處。遺物求己。泝懷元妙之門。求意希微之域。天子不得而臣。諸
侯不得而友。行年九十。被裘鼓琴而歌。孔子過之。問曰。先生何